

Na osnovu člana 39. Ustava Hercegovačko-neretvanske kantona („Službene novine HNK“, broj: 2/98, 4/00, 7/04 i 6/21), Skupština Hercegovačko-neretvanskog kantona, na sjednici održanoj dana _____2026. godine donosi

ZAKON O SLATKOVODNOM RIBARSTVU HERCEGOVAČKO-NERETVANSKOG KANTONA

I - OSNOVNE ODREDBE

Član 1.

- (1) Ovim zakonom uređuje se slatkovodno ribarstvo: ribolovne vode, ribolov, akvakultura, zaštita riba, ribarsko-čuvarska služba, nadzor nad provođenjem zakona, kaznene odredbe i druga pitanja koja su od značaja za oblast slatkovodnog ribarstva u Hercegovačko-neretvanskom kantonu (u daljnjem tekstu: HNK).
- (2) Ribe u ribolovnim vodama koriste se na održiv način koji doprinosi očuvanju biološke raznolikosti ekoloških sistema.
- (3) Ribe se u ribolovnim vodama mogu loviti i uzgajati pod uslovima propisanim ovim zakonom i drugim propisima donesenim na osnovu njega.

Član 2.

- (1) U ovom zakonu u upotrebi su pojmovi sa sljedećim značenjem:
 - a) akvakultura je privredna djelatnost uzgoja riba i drugih vodenih organizama u smislu reproduciranja i hranjenja u ribnjacima, kavezima, ogradama ili lagunama;
 - b) godišnji program promicanja ribarstva (u daljnjem tekstu: godišnji program) je akt potreban za provođenje ribarske osnove tokom kalendarske godine;
 - c) lovostaj je vrijeme u kojem se pojedine vrste riba, osim riba iz akvakulture, ne mogu loviti i stavljati u promet;
 - d) poribljavanje je plansko unošenje riba u ribolovne vode na osnovu ribarske osnove i godišnjeg programa;
 - e) privredni ribolov je izlov riba na ribolovnom području radi stavljanja u promet i sticanja dohotka;
 - f) ribolovne vode su kopnene vode, a obuhvataju rijeke, potoke, prirodna i umjetna jezera, bare, kanale i druge vode u kojima žive ribe;
 - g) slatkovodno ribarstvo je uzgoj, lov i zaštita riba u ribolovnim vodama, ribnjacima, ograđenim dijelovima ribolovnih voda i kavezima, kao i promet i korištenje ulovljenih riba;
 - h) ribnjaci, ograđeni dijelovi ribolovne vode i kavezi jesu uređeni prostori na poljoprivrednom ili drugom zemljištu ili ribolovnoj vodi namijenjeni za uzgoj riba, riblje mlađi i oplođene ikre, koji ispunjavaju propisane uslove i ne smatraju se ribolovnom vodom u smislu ovog zakona;
 - i) ribolovno područje je dio ribolovne vode koje čini hidrološku, biološku i ekonomsku cjelinu, a u okviru granica HNK;

- j) ribolovna zona je dio ribolovnog područja na kojem se ostvaruje ribolovno pravo, a koja je određena administrativnim granicama jedinice lokalne samouprave unutar HNK;
- k) riblji fond u ribolovnim vodama je fond riba ribolovnog područja, a služi kao osnova za razvijanje i provedbu sportsko-rekreativnog ribolova;
- l) ribolov je lov riba uz upotrebu ribolovnog pribora i opreme, a može biti privredni ribolov ili sportsko-rekreativni ribolov;
- m) ribarska osnova je stručna studija o načinu upravljanja ribolovnom zonom kao dijelom ribolovnog područja, a odnosi se na obavljanje sportsko-rekreativnog ribolova;
- n) ribič je lice koje lovi ribu uz upotrebu dopuštenog ribolovnog pribora, opreme i mamaca radi rekreacije i sporta;
- o) ribolovni pribor je sredstvo kojim se obavlja ribolov;
- p) ribolovna udruženja i njihovi savezi jesu udruženja građana osnovani radi sportsko-rekreativnog ribolova, takmičenja, odgoja i obrazovanja sportsko-rekreativnih ribolovaca;
- q) ribolovno pravo je osnovni akt kojim se korisnicima dijela ribolovnog područja-ribolovne zone omogućava obavljanje sportsko-rekreativnog ribolova u određenoj ribolovnoj zoni, u kojem su propisane sve mjere za provođenje zaštite riba na toj ribolovnoj zoni;
- r) sportsko-rekreativni ribolov je lov riba udicom na dijelu ribolovnog područja-ribolovnoj zoni radi razonode i rekreacije, kao i sportske aktivnosti;
- s) ulov jesu ulovljeni primjerci riba u sportsko - rekreativnom ribolovu ;
- t) zaštita je skup mjera koje se poduzimaju radi očuvanja i osiguranja uslova za dugoročno i održivo korištenje riba.

II - RIBOLOVNE VODE

Član 3.

Ribolovne vode su sve kopnene vode, osim voda:

- a) u posebno zaštićenim dijelovima prirode proglašenim na osnovu posebnog zakona;
- b) u ribnjacima;
- c) u akumulacijama, jezerima ili tekućim vodama iz kojih se zahvata voda za piće za koju su na osnovu posebnog zakona donesene odluke o zaštiti izvorišta;
- d) u akumulacijama, jezerima ili tekućim vodama koje su rezervisane za javnu vodoopskrbu.

Član 4.

- (1) Ribolovno područje je dio ribolovne vode koje čini hidrološku, biološku i ekonomsku cjelinu u okviru granica HNK.
- (2) Na području HNK utvrđuje se jedno ribolovno područje "HERCEGOVAČKO-NERETVANSKO".
- (3) Ribolovna zona je dio ribolovnog područja na kojem se ostvaruje ribolovno pravo za sportsko-rekreativni ribolov.
- (4) Granice dijelova ribolovnog područja-ribolovnih zona unutar ribolovnog područja "HERCEGOVAČKO-NERETVANSKO" određene su administrativnim granicama jedinica lokalne samouprave.

- (5) Granica između ribolovnih zona na tekućoj ribolovnoj vodi određuje se upravno na maticu toka od obale do obale, odnosno do glavnih obrambenih nasipa.

Član 5.

Dijelove ribolovnog područja-ribolovne zone, određuje i ustupa na korištenje fizičkom i pravnom licu, odnosno udruženju sportskih ribolovaca (u daljnjem tekstu: korisnik) kantonalno ministarstvo poljoprivrede, šumarstva i vodoprivrede (u daljnjem tekstu: kantonalno ministarstvo) uz prethodno pribavljeno mišljenje nadležnog organa jedinice lokalne samouprave, na čijem teritoriju se nalazi dio ribolovnog područja- ribolovna zona (u daljnjem tekstu: ribolovna zona).

Član 6.

- (1) Ribolovne zone, kantonalno ministarstvo, uz prethodno pribavljeno mišljenje nadležnog organa jedinice lokalne samouprave, ustupa na korištenje korisniku davanjem ribolovnog prava putem konkursa, uz naknadu i na osnovu predočenog programa gospodarenja ribolovnom zonom.
- (2) Vlada HNK utvrđuje visinu naknade za ribolovne zone iz člana 4. ovog Zakona, a na prijedlog nadležnog organa jedinica lokalne samouprave za određenu ribolovnu zonu.
- (3) Naknada za ustupanje na korištenje ribolovnog prava su namjenska sredstva koja se uplaćuju u Budžet HNK i dijele u omjeru 50% kantonu, a 50% lokalnoj samoupravi na čijem području je ribolovna zona.

Član 7.

- (1) Kantonalno ministarstvo s korisnikom zaključuje ugovor o ustupanju ribolovne zone koja sadrži: naziv ribolovne zone, utvrđene granice ribolovne zone, mjere zaštite ribljeg fonda, način upotrebe ribolovne zone i uslove raskidanja ugovora.
- (2) Korisnik kome je ribolovna zona ustupljena na korištenje ne može to ribolovno pravo ustupiti drugim pravnim ili fizičkim licima.

Član 8.

- (1) Ribolovno pravo nad ribolovnom zonom izdaje se na period od 10 godina.
- (2) Ribolovna zona koja konkursom nije mogla biti ustupljena na korištenje privremeno se daje na upotrebu bez konkursa pravnom licu koja obavlja djelatnost ribarstva ili udruženju sportskih ribolovaca, do donošenja odluke o davanju ribolovnog prava u skladu sa članom 6. ovog zakona.
- (3) Ustupanje u smislu stava 2. ovog člana može trajati najduže dvije godine.

Član 9.

- (1) Korisnik je dužan vidno označiti granice ribolovne zone, kao i mjesta na ribolovnoj zoni na kojima je zabranjen ribolov (prirodna riblja plodišta i sl.).
- (2) Granice iz stava 1. ovog člana korisnik je dužan označiti u roku od šest mjeseci od dana kada je počeo koristiti ribolovnu zonu, odnosno od dana zaključivanja ugovora, a granice na ribolovnoj zoni na kojoj je zabranjen ribolov tri mjeseca od dana početka zabrane.
- (3) Federalni ministar poljoprivrede, šumarstva i vodoprivrede (u daljnjem tekstu: federalni ministar) propisuje način označavanja ribolovnog područja, odnosno dijela ribolovnog područja-ribolovne zone.

Član 10.

- (1) Korisnik je dužan najkasnije u roku godinu dana od dana kada je dobio ribolovno pravo na ribolovnoj zoni realizovati predočeni program gospodarenja ribolovnom zonom iz člana 6. stav 1. ovog zakona i donijeti program promicanja ribarstva (u daljnjem tekstu: ribarska osnova).
- (2) Ribarska osnova važi trajno uz monitoring, a najkasnije do isteka roka od pet godina od dana potvrđivanja ribarske osnove, mora se obaviti revizija ribarske osnove.
- (3) Ribarsku osnovu izrađuju pravna lica iz člana 42. ovog zakona, uz obavezu prethodnog stavljanja na uvid pripremljenog prijedloga dokumenta na svojoj web stranici.
- (4) U skladu sa ribarskom osnovom korisnik donosi godišnji program.
- (5) Godišnji program mora sadržavati:
 - a) procjenu vrsta, količine riba i njihova prirasta u ribolovnoj zoni;
 - b) dozvoljeni godišnji ulov ribe po vrstama i dozvoljeni dnevni ulov ribe;
 - c) plan poribljavanja koji sadrži tabelarno prikazan detaljan opis: ribolovna voda, vrijeme poribljavanja, vrste riba/riblje mladi za poribljavanje koje se mogu nabaviti na tržištu, dužina riba u centimetrima, količina u komadima, cijena po komadu utvrđena na osnovu tržišne cijene riba za tekuću godinu, iznos sredstava po vrstama i dužini riba, kao i ukupan iznos sredstava za ribolovnu vodu. U Planu poribljavanja treba posebno iskazati obavezu poribljavanja korisnika ribolovnog prava i obavezu kontinuiranog poribljavanja svakog vlasnika/korisnika brana, vodoprivrednih ili drugih objekata ili postrojenja koji nisu u mogućnosti osigurati slobodnu migraciju ribe.
 - d) mjere i načine zaštite ribolovne zone, organizaciju rada ribočuvarske službe, plan rada na uređenju okolice;
 - e) planirane sportsko-ribolovne aktivnosti;
 - f) prikaz ukupnih novčanih sredstava i namjenu korištenja tih sredstava za realizaciju godišnjeg programa.
- (6) Godišnji program donosi se do kraja tekuće godine za sljedeću godinu.
- (7) Saglasnost za ribarsku osnovu, reviziju ribarske osnove i godišnje programe, izdaje Federalno ministarstvo poljoprivrede, vodoprivrede i šumarstva (u daljnjem tekstu: Federalno ministarstvo) na osnovu mišljenja kantonalnog ministarstva. Kantonalno ministarstvo dostavlja Federalnom ministarstvu mišljenje, uz prethodno pribavljeno mišljenje nadležnih organa jedinica lokalne samouprave i provedenu Javnu raspravu o dostavljenom prijedlogu ribarske osnove, revizije ribarske osnove i godišnjeg programa.

Član 11.

- (1) Korisnici susjednih ribolovnih područja-ribolovnih zona koji se nalaze na istoj ribolovnoj vodi dužni su svoje programe uskladiti u pogledu mjera zaštite i lova riba, zaštite ribolovnih voda i poribljavanja.
- (2) Korisnik koji je konkursom dobio ribolovno pravo na ribolovnoj zoni, do donošenja ribarske osnove, ribolovnu zonu koristi na osnovu privremenog programa koji se donosi za prvu godinu korištenja.
- (3) Privremeni program korisnik donosi u roku od 60 dana od dana ustupanja ribolovne zone na korištenje.

Član 12.

(1) Ribarska osnova sadrži:

- a) osnovne hidrološke, biološke, fizičke, hemijske i druge karakteristike voda ribolovne zone;
- b) sastav ribljeg fonda po vrstama (kvalitativni i kvantitativni);
- c) mogućnost i način prirodnog i umjetnog prirasta ribljeg fonda po vrstama riba;
- d) mjere za zaštitu i lov riba i životinja kojima se ribe hrane;
- e) mjere za zaštitu ribljeg mrjestilišta, riba i riblje ikre sa plavnih područja;
- f) mjere za otkrivanje i suzbijanje zagađivača voda ribolovne zone;
- g) uvjete obavljanja sportsko-rekreativnog ribolova i mjere za promociju sportsko-rekreacijskog ribolova i ribolovnog turizma na ribolovnoj zoni;
- h) organiziranje ribočuvarske službe;
- i) program poribljavanja koji sadrži tabelarno prikazan detaljan opis: ribolovna voda, vrijeme poribljavanja, vrste riba/riblje mlađi za poribljavanje koje se mogu nabaviti na tržištu, dužina riba u centimetrima, količina u komadima, cijena po komadu utvrđena na osnovu tržišne cijene riba za tekuću godinu, iznos sredstava po vrstama i dužini riba, kao i ukupan iznos sredstava za ribolovnu vodu. U Programu poribljavanja treba posebno iskazati obavezu poribljavanja korisnika ribolovnog prava i obavezu kontinuiranog poribljavanja svakog vlasnika/korisnika brana, vodoprivrednih ili drugih objekata ili postrojenja koji nisu u mogućnosti osigurati slobodnu migraciju ribe.
- j) prikaz ukupnih novčanih sredstava i namjenu korištenja tih sredstava za realizaciju ribarske osnove.

(2) U slučaju pomora riba, većeg od jedne trećine ihtiomase procijenjene ribarskom osnovom, mora se obaviti revizija ribarske osnove.

(3) Ribarsku osnovu, kao i njenu reviziju, izrađuju pravna lica iz člana 42. ovog zakona, na način i po postupku kao kod izrade ribarske osnove.

Član 13.

(1) Radi evidentiranja podataka o površini ribolovne zone, granicama ribolovne zone, količini i vrstama riba, te o nositeljima ribolovnih prava, u kantonalnom ministarstvu vodi se ribarski katastar.

(2) Oblik, sadržaj i način vođenja ribarskog katastra iz stava 1. ovog člana propisuje federalni ministar poljoprivrede, vodoprivrede i šumarstva (u daljnjem tekstu: federalni ministar).

(3) Korisnici ribolovne zone, dužni su dostaviti podatke za vođenje ribarskog katastra iz stava 1. ovog člana kantonalnom ministarstvu do kraja marta tekuće godine za prethodnu godinu.

III - RIBOLOV

Član 14.

(1) Sportsko-rekreativni ribolov se obavlja sredstvima i priborom kojima se ne ugrožava riba i životinje kojima se ribe hrane.

(2) Federalni ministar donosi propise o načinu, priboru i sredstvima kojima se obavlja ribolov.

Član 15.

(1) Ribu na ribolovnim vodama mogu loviti ribiči:

- a) koji imaju položen ispit za lov riba u sportsko-rekreativnom ribolovu (u daljnjem tekstu: ribički ispit);
 - b) koji imaju dozvolu za lov riba u sportsko-rekreativnom ribolovu.
- (2) Odredba stava (1) tačka a) ovog člana ne odnosi se na ribiče strane državljanke.

Član 16.

- (1) Sportsko-ribolovni savez Federacije BiH (u daljnjem tekstu: Savez) vodi evidenciju o položenim ribičkim ispitima prema federalnom Programu za polaganje ribičkog ispita.
- (2) Savez organizuje podjelu dozvola korisnicima ribolovnog prava, a po godišnjem programu takmičenja organizuje, sprovodi i izdaje odobrenje za sva takmičenja u sportsko-rekreativnom ribolovu, osim međunarodnih takmičenja, prikuplja podatke od korisnika ribolovnog prava o količini i sastavu ulova u sportsko-rekreativnom ribolovu, te izdaje ribočuvarske značke i legitimacije na zahtjev korisnika ribolovnog prava.
- (3) Korisnici ribolovnih prava se mogu organizovati u Sportsko-ribolovni savez Hercegovačko – neretvanskog kantona.

Član 17.

- (1) Program i način polaganja ribičkog ispita, obrazac i način izdavanja uvjerenja o položenom ribičkom ispitu propisuje federalni ministar.
- (2) Program za polaganje ribičkog ispita donosi federalni ministar, uz prethodno pribavljeno mišljenje Saveza.
- (3) Provjeru znanja prema Programu za polaganje ribičkog ispita obavlja komisija koju na prijedlog Saveza imenuje federalni ministar.
- (4) Oblik, sadržaj i način vođenja registra o izdanim uvjerenjima o položenom ribičkom ispitu propisuje federalni ministar.

Član 18.

- (1) U sportsko-rekreativnom ribolovu ribiči moraju kod sebe imati dozvolu za ribolovnu zonu na kojoj obavljaju ribolov.
- (2) Dozvole iz stava (1) ovog člana izdaje kantonalno ministarstvo korisniku ribolovne zone posredstvom Saveza.
- (3) Ribiči za obavljanje sportsko-rekreativnog ribolova na određenoj ribolovnoj zoni kupuju dozvole od korisnika ribolovnog prava za tu ribolovnu zonu.
- (4) Korisnik ribolovnog prava ne može dobiti dozvolu za tekuću kalendarsku godinu, ako nema potvrđenu ribarsku osnovu i potvrđen godišnji program.
- (5) Korisnik ribolovne zone može prodavati dozvole:
 - a) samo za ribolovnu zonu za koju je dobio ribolovno pravo;
 - b) samo ribičima sa položenim ribičkim ispitom;
 - c) ribičima stranim državljanima bez položenog ribičkog ispita.
- (6) Dozvola koja je potvrđena od korisnika ribolovne zone vrijedi samo na ribolovnoj zoni za koju je korisnik dobio ribolovno pravo.
- (7) Iznimno od odredbi stava (6) ovog člana korisnici ribolovnog prava mogu međusobno ugovoriti pravo reciprociteta ribolova na ribolovnom području ili u ribolovnoj zoni, za koju su dobili ribolovno pravo, ako je to u skladu sa ribarskim osnovama za ta ribolovna područja ili te ribolovne zone, ali takvo pravo reciprocitetnog ribolova mora biti naznačeno u dozvoli.
- (8) Federalni ministar propisuje oblik i sadržaj obrasca dozvole za obavljanje sportsko-rekreativnog ribolova.

Član 19.

Privredni ribolov se ne može obavljati na ribolovnom području "HERCEGOVAČKO NERETVANSKO".

IV – AKVAKULTURA

Član 20.

- (1) Akvakultura obuhvata uzgoj riba i drugih vodenih organizama u ribnjacima, ograđenim dijelovima ribolovne vode i kavezima u ribolovnoj vodi.
- (2) Akvakulturom se mogu baviti obrtnici i pravna lica registrovana za obavljanje akvakulture i/ili korisnik ribolovne zone ako je akvakultura predviđena ribarskom osnovom.
- (3) Obrtnici i pravna lica mogu započeti obavljati djelatnost akvakulture ako imaju dozvolu za akvakulturu, koju izdaje kantonalno ministarstvo, uz prethodno pribavljenu veterinarsko-zdravstvenu saglasnost na lokaciju i projektnu dokumentaciju za izgradnju i rekonstrukciju objekata, u skladu sa odredbama Zakona o veterinarstvu ("Službene novine Federacije BiH", broj 46/00).

Član 21.

- (1) Dozvola za akvakulturu, kao i zahtjev za izdavanje dozvole za akvakulturu mora sadržavati:
 - a) firmu obrtnika ili firmu pravnog lica kojoj se izdaje dozvola za akvakulturu;
 - b) naznaku ribolovne zone, na kojoj će se obavljati djelatnost akvakulture;
 - c) površinu ribnjaka, ograđenog vodenog prostora ili zapreminu kaveza koji će se koristiti za akvakulturu;
 - d) vrste riba ili drugih vodenih organizama koji će se uzgajati;
 - e) stručnu studiju o opravdanosti akvakulture;
 - f) koncesiju za korištenje voda za uzgoj riba i/ili drugih vodenih organizama, izdanu u skladu sa posebnom zakonom.
- (2) Zabranjeno je uzgajati vrste riba i/ili drugih vodenih organizama koji nisu upisani u dozvolu za akvakulturu.
- (3) Protiv rješenja kantonalnog ministarstva kojim se uskraćuje dozvola za akvakulturu, može se izjaviti žalba Vladi HNK u roku od 15 dana od dana prijema rješenja.

Član 22.

- (1) Dozvola za akvakulturu prestaje vrijediti prestankom obavljanja djelatnosti, prestankom postojanja pravnog lica, odnosno obrtnika i prestankom ugovora o koncesiji za korištenje voda za uzgoj riba i/ili drugih vodenih organizama.
- (2) Dozvola za akvakulturu oduzima se ako se utvrdi da obrtnik ili pravno lice uzgaja vrste riba i/ili drugih vodenih organizama koji nisu upisani u dozvoli za akvakulturu ili da korisnik ne ispunjava uslove, odnosno obaveze propisane ovim zakonom.
- (3) Rješenje o oduzimanju dozvole za akvakulturu donosi kantonalni poljoprivredni inspektor.
- (4) Protiv rješenja iz stava (3) ovog člana može se izjaviti žalba kantonalnom ministarstvu u roku od 15 dana od dana prijema rješenja.
- (5) Registar o izdanim dozvolama za akvakulturu vodi kantonalno ministarstvo.
- (6) Oblik, sadržaj i način vođenja registra o izdanim dozvolama za akvakulturu propisuje kantonalni ministar.

Član 23.

- (1) Na ribolovnoj vodi na kojoj se riba uzgaja u kavezima ili unutar ograda zabranjeno je loviti ribe i obavljati druge radnje koje mogu ometati djelatnost akvakulture na udaljenosti manjoj od 50 metara od označenih granica koncesijom dodijeljene vodene površine.
- (2) Kantonalno ministarstvo – Uprava za vode će obavijestiti vlasnike hidroenergetskih objekata o granicama koncesije dodijeljene vodene površine“.

V - ZAŠTITA RIBA

Član 24.

- (1) Ribolovna zona koja je određena za sportsko-rekreativni ribolov može se koristiti i za sanacijski ribolov.
- (2) Dozvolu za sanacijski ribolov na ribolovnoj zoni iz stava 1. ovog člana izdaje Federalno ministarstvo.
- (3) Dozvolom iz stava (2) ovog člana određuje se vrijeme i način obavljanja ribolova, kao i vrsta i količina ribe koju treba izloviti.

Član 25.

- (1) Ribolov za naučno-istraživačke svrhe na ribolovnim vodama može se obavljati na osnovu dozvole koju izdaje Federalno ministarstvo, na osnovu zahtjeva i predstavljenog istraživačkog programa.
- (2) U dozvoli za ribolov za naučno-istraživačke svrhe mora biti naznačeno:
 - a) na kojim vodama se obavlja ribolov za naučno-istraživačke svrhe;
 - b) u kojim slučajevima, odnosno pod kojim uslovima;
 - c) u kom vremenu, vrsti i količini ribe;
 - d) način upotrebe sredstava i pribora za obavljanje ovoga ribolova.
- (3) Korisnik dozvole dužan je izvijestiti kantonalno ministarstvo i korisnika o vremenu u kojem će obavljati ribolov za naučno-istraživačke svrhe.

Član 26.

- (1) Ribolov pomoću električne struje (u daljnjem tekstu: elektro-ribolov) na ribolovnoj zoni može se obavljati u slučaju:
 - a) izlovljavanja riba radi poribljavanja;
 - b) uklanjanja manje vrijednih vrsta riba;
 - c) sagledavanja stanja ribljeg fonda, a na osnovu dozvole koju izdaje Federalno ministarstvo.
- (2) Elektroribolov mogu obavljati samo lica koja su stručno osposobljena za tu vrstu ribolova.
- (3) O izvršenom elektroribolovu sastavlja se zapisnik na licu mjesta, uz prisustvo nadležnog poljoprivednog inspektora, predstavnika korisnika, veterinara i drugih lica.
- (4) Zapisnik ima snagu javne isprave.
- (5) Korištenje EHO sonara na ribolovnoj zoni dozvoljeno je samo za naučno-istraživačke svrhe.

Član 27.

Korisnici dozvola za sanacijski ribolov, ribolov za naučno-istraživačke svrhe i elektroribolov dužni su po izvršenom ribolovu dostaviti izvještaj Federalnom ministarstvu o količini i vrsti ribe, vremenu obavljanja ribolova, mjestu i načinu ribolova, odnosno korištenju pribora i sredstava za obavljeni ribolov.

Član 28.

- (1) Korisnik je dužan svake godine, u skladu sa godišnjem programu obavljati poribljavanje ribolovne zone.
- (2) Poribljavanje ribolovne zone obavlja se zdravom ribom, ribljom mlađi i oplodnom ikrom, nakon izvršene zdravstvene kontrole i utvrđivanja kakvoće ribe, riblje mlađi, ikre i ribolovne vode.
- (3) Federalni ministar odobrava unos novih vrsta ribe u ribolovnu vodu, nakon pribavljenog mišljenja pravnog lica iz člana 42. ovoga Zakona.

Član 29.

- (1) Fizička i pravna lica koje svojim aktivnostima na vodotocima i akumulacijama dovedu do pomora ribe, a za koje nadležne inspekcije utvrde da su je prouzrokovali, moraju korisniku ribolovne zone nadoknaditi štetu na ribljem fondu po odštetnom cjenovniku u ribarstvu.
- (2) Izgradnja/rekonstrukcija brane, vodoprivrednog ili drugog objekta ili postrojenja na ribolovnoj vodi može se obavljati pod uslovima da se osigura nesmetano razmnožavanje ribe, zaštita ribljeg fonda i migracija ribe a korisnici dovodnih, turbinskih i drugih kanala dužni su ugraditi i održavati uređaje za sprječavanje ulaza ribe u te kanale.
- (3) Vlasnici/korisnici postojećih brana, vodoprivrednih i drugih objekata ili postrojenja koji nisu u mogućnosti osigurati slobodnu migraciju riba dužni su osigurati kontinuirano poribljavanje ribom/ribljom mlađi radi održavanja prirodne reprodukcije, u skladu sa ribarskom osnovom i godišnjim programom propisanim u članovima 10. i 12. ovog Zakona za koje je Federalno ministarstvo korisniku ribolovnu prava za ribolovnu zonu izdalo saglasnost.
- (4) Korisnici ribolovne zone nakon dobivanja saglasnosti Federalnog ministarstva na godišnji program dužni su godišnji program i saglasnost Federalnog ministarstva na godišnji program dostaviti vlasnicima/korisnicima postojećih brana, vodoprivrednih i drugih objekata ili postrojenja koji imaju obavezu osigurati kontinuirano poribljavanje ribom/ribljom mlađi radi održavanja prirodne reprodukcije u skladu sa godišnjim programom.
- (5) Vlasnici/korisnici postojećih brana, vodoprivrednih i drugih objekata ili postrojenja koji nisu u mogućnosti osigurati slobodnu migraciju riba i korisnici ribolovne zone su dužni izvršiti kontinuirano poribljavanje ribom/ribljom mlađi na način definisan Godišnjim programom za tekuću godinu.
- (6) Ukoliko vlasnici/korisnici postojećih vodoprivrednih objekata iz stava 3. ovog člana, ne budu u mogućnosti da, u skladu sa ovim Zakonom, ispune obavezu poribljavanja, ministarstvo će im Rješenjem utvrditi obavezu isplate novčane naknade korisniku ribolovne zone za vrste ribe/mlađi za koje nije izvršeno poribljavanje u količini određenoj prema Godišnjem programu.
- (7) Nadležno ministarstvo će Rješenje iz stava 6. ovog člana donijeti po zahtjevu vlasnika/korisnika postojećih vodoprivrednih objekata.
- (8) Korisnik ribolovne zone dužan je sredstva iz stava 6. ovog člana u cijelosti namjenski utrošiti za poribljavanje ribom/ribljom mlađi. Korisnik ribolovne zone će poribljavanje izvršiti uz prisustvo nadležne inspekcije, te će do 31. januara tekuće godine Ministarstvu podnijeti izvještaj o izvršenom poribljavanju.
- (9) Postupak donošenja Rješenja iz stava 6. ovog člana, propisat će se Pravilnikom koji će nadležni ministar donijeti u roku od 90 (devedeset) dana od dana stupanja na snagu ovog Zakona.

Član 30.

- (1) U prirodnim ribljim mrijestilištima zabranjeno je vaditi šljunak, kamen i panjeve, a u vrijeme mrijesta zabranjeno je obavljati i druge radnje koje ometaju mriješćenje.
- (2) U prirodnim ribljim mrijestilištima zabranjene su sve vrste ribolova, osim sanacijskog ribolova predviđenim ribarskom osnovom koji se obavlja radi zaštite ugroženih vrsta riba, riblje mladi i ikre.
- (3) Aktom o proglašenju prirodnog ribljeg mrijestilišta mogu se odrediti i druge mjere zaštite.

Član 31.

Radi zaštite riba i promicanja ribarstva federalno ministarstvo određuje lovostaj za sve ili pojedine vrste ribe na ribolovnom području ili na ribolovnim zonama, kao i zabranu lova riba koje nemaju propisanu veličinu u skladu sa federalnim Pravilnikom o načinu, alatima i sredstvima kojima se obavlja ribolov.

Član 32.

Veterinarsko-zdravstvena zaštita ribljeg fonda u ribolovnim vodama i ribnjacima obavlja se na način kako je to regulisano odredbama Zakona o veterinarstvu, kao i propisima donesenim na osnovu njega.

VI - RIBOČUVARSKA SLUŽBA

Član 33.

- (1) Radi zaštite ribolovne zone korisnici ribolovnog prava obavezni su organizovati ribočuvarsku službu.
- (2) Ribočuvarsku službu obavljaju ribočuvari koji moraju imati položen ribički ispit i najmanje IV stepen obrazovanja.
- (3) Ribočuvare imenuje korisnik ribolovnog prava za ribolovnu zonu za koju je dobio ribolovno pravo.
- (4) Udruženje sportskih ribolovaca koja koristi ribolovnu zonu može, pored ribočuvara da osigura čuvanje ribolovne zone preko svojih članova.

Član 34.

- (1) Ribočuvar ima legitimaciju i značku kojima se dokazuje njegovo službeno svojstvo, identitet i ovlasti.
- (2) Legitimaciju i značku iz stava (1) ovog člana ribočuvaru izdaje korisnik ribolovne zone.
- (3) Organizaciju i rad ribočuvarske službe, oblik i sadržaj obrasca legitimacije i značke ribočuvara propisuje federalni ministar.

Član 35.

- (1) Prilikom obavljanja svoje djelatnosti ribočuvar je ovlašten da od ribiča:
 - a) zatraži dozvolu za obavljanje ribolova;
 - b) pregleda ribolovni pribor, opremu za ribolov i ulov;
 - c) zatraži ličnu kartu ili drugi dokument na osnovu kojeg može utvrditi njegov identitet.
- (2) Kada utvrdi protuzakonito postupanje ribočuvar je ovlašten:
 - a) ukoliko dužina ulovljene ribe nije u skladu sa propisanom dužinom za određenu vrstu ribe, naložiti vraćanje ulovljene ribe u vodu i opomenuti ribiča na zakonsku obavezu poštivanja određene dužine;

- b) ukoliko ulovljena riba ne odgovara zakonom propisanoj dužini, a više nije živa, oduzet će pribor kojim je izvršen ribolov sa ulovom, i sačiniti zapisnik o zapljeni;
 - c) ukoliko lice u ribolovu odbije da se legitimira, ribočuvar je dužan bez sukoba potražiti drugi izvor moguće identifikacije (registracijski broj automobila ili motocikla, svjedoka koji poznaje lice koje izbjegava identifikaciju i sl.);
 - d) ukoliko to nije moguće, pozvat će patrolu MUP-a ili korisnika ribolovne vode radi upućivanja poziva za pomoć;
 - e) ukoliko ribočuvar u radu zatekne lice ili lica koja obavljaju kazneno djelo na ribolovnoj zoni, mora osigurati pomoć MUP-a ili volonterske ribočuvarske službe, pa tek onda pokušati identificirati i legitimirati lica koja vrše krivolov;
 - f) ukoliko ribočuvar u radu pronađe mreže, pribor i druga sredstva za krivolov, dužan je prvo osigurati podršku MUP-a ili dva predstavnika volonterske ribočuvarske službe;
 - g) organizovati noćni obilazak i akcije u dogovoru sa MUP-om, sa najmanje dva predstavnika MUP-a ili dva predstavnika volonterske ribočuvarske službe;
 - h) zatražiti dokumente o identifikaciji i dozvole za ribolov od lica koja love ribu na obali ili se nalaze na čamcima ili drugim plovnim objektima na ribolovnoj vodi, kao i od lica koje se nalaze u neposrednoj blizini ribolovnih voda u šatorima ili vozilima, a sa sredstvima za ribolov;
 - i) provjeriti je li se lice koje se kontroliše pridržava propisanih minimalnih mjera i dozvoljenog maksimalnog ulova.
- (3) Ako ribočuvar zatekne na ribolovnim vodama na kojima obavlja ribočuvarsku službu, lice koje obavlja sportsko-rekreativni ribolov ili druge radnje protivne ovom zakonu i propisima donesenim na osnovu njega, dužan je u roku od tri dana o tome sastaviti zapisnik i dostaviti ga kantonalnom poljoprivrednom inspektoratu.
- (4) Ako ribočuvar privremeno oduzme ribolovni pribor, opremu za ribolov ili ulov, dužan je u roku od 24 sata o tome sastaviti zapisnik i dostaviti ga kantonalnom poljoprivrednom inspektoratu, te dostaviti kopiju pismene potvrde o privremenom oduzimanju.
- (5) Lice kojem je privremeno oduzet ribolovni pribor, oprema za ribolov ili ulov izdaje se potvrda o tačno označenim predmetima ili ulovom po vrsti i količini.
- (6) Ribočuvar je ovlašten da privremeno oduzme i bez odlaganja preda korisniku ribolovnog prava ulov, sredstva i pribor za ribolov, kao i druge predmete pronađene na ribolovnoj zoni, ako postoji osnovana sumnja da su upotrebljeni ili bili namijenjeni za izvršenje prekršaja, ili su nastali ili pribavljeni počinjenjem prekršaja.
- (7) S privremeno oduzetim ribolovnim priborom, opremom za ribolov ili ulovom, korisnik ribolovnog prava ne može raspolagati (uništiti, prodati, predati, poklanjati, zamijeniti i sl.), do okončanja prekršajnog postupka ili postupka pred drugim nadležnim organom.
- (8) Zapisnik i potvrda iz stava (5) ovog člana koriste se u prekršajnom postupku kao dokaz uz prijavu za pokretanje prekršajnog postupka koju podnosi kantonalni poljoprivredni inspektor.
- (9) Ribiči su dužni ribočuvarima omogućiti obavljanje ribočuvarskog nadzora i pružiti im sve potrebne podatke u vezi sa obavljanjem ribočuvarskog nadzora.

Član 36.

Odredbe ovog zakona odnose se i na uzgoj, zaštitu i lov rakova, školjki, žaba, pijavica, kornjača, zmija, kao i na druge životinje koje žive u ribolovnoj vodi i kojima se ribe hrane.

Član 37.

Udruženja sportskih ribolovaca, ribiči i druga fizička lica ne mogu ulovljenu ribu u sportsko-rekreativnom ribolovu stavljati u promet.

Član 38.

U vrijeme lovostaja fizičko i pravno lice može stavljati u promet ribu na koju se odnosi lovostaj, ako ima pisani dokaz o:

- a) porijeklu, odnosno uvozniku ribe;
- b) vrsti i količini ribe;
- c) kupovini ribe.

Član 39.

Pri prometu ribe koje nemaju propisanu veličinu, fizičko i pravno lice mora imati pisane dokaze navedene u članu 38. ovog zakona.

Član 40.

(1) Na ribolovnoj zoni i drugoj ribolovnoj vodi zabranjeno je:

- a) loviti ribu eksplozivom i drugim rasprskavajućim sredstvima;
 - b) loviti i uništavati ribu i riblju mlad u vrijeme lovostaja;
 - c) loviti ribu harpunom, ostima i drugim zabranjenim sredstvima i priborom, vatrenim oružjem ili hemijskim i drugim sredstvima koja ubijaju i truju ili omamljuju ribu;
 - d) loviti ribu direktno rukom;
 - e) zagađivati ribolovnu vodu štetnim i opasnim materijama koje mogu mijenjati ili pogoršavati ustaljenu kakvoću vode ili dijela ribolovne vode i na taj način ugrožavati riblji fond;
 - f) odlagati otpadni materijal u ribolovne vode (kabasti materijal, smeće, i sl.);
 - g) poribljavati ribolovne vode nekvalitetnom i bolesnom ribom, ribljom mlad i oplodjenom ikrom;
 - h) pregrađivati vodeni tok privremenim ili stalnim pregradama koje ometaju prolaz ribe, ako to nije predviđeno investicijsko-tehničkom dokumentacijom za izgradnju ili rekonstrukciju objekata ili postrojenja ili ribarskom osnovom;
 - i) zatvarati, odvrćati i crpiti vodu iz ribolovne vode, ako to uzrokuje opasnost za opstanak ribe;
 - j) naglo ispuštati vodu iz prirodnih i umjetnih jezera i drugih akumulacija, ako se time ugrožava opstanak ribe;
 - k) močiti lan, konoplju, divizmu i druge biljke koje štete ribljem fondu;
 - l) loviti ribu na ribolovnoj vodi na odstojanju manjem od 300 metara od brana hidroelektrana ili sličnog postrojenja na kojem postoji riblja staza, izuzev u gornjem kompenzacijskom bazenu (jezero Vrutak PHE Čapljina) u svrhu sportsko-rekreativnog ribolova;
 - m) ometati postavljanje znakova kojima se označava ribolovna zona, prirodno riblje mrijestilište, ribnjak ili ribolovna voda za ribolov pod posebnim uslovima i mjestima na kojima je ribolov zabranjen, kao i obavljati oštećenje i premještanje znakova;
 - n) loviti noću na ribolovnoj zoni;
 - o) sprječavati spašavanje ribe i riblje mlad sa zemljišta koje je poplavljeno;
 - p) držanje sredstava i pribora za privredni ribolov u objektima i na objektima koji se nalaze na ribolovnoj vodi ili na drugim objektima koji se nalaze uz ribolovnu zonu;
- (2) Odredbe stava (1) tačke d), e), f), h) i j) ovog člana odnose se i na akvakulturu.

Član 41.

- (1) Korisnik ribolovne zone dužan je poduzimati potrebne mjere za vraćanje riba u ribolovnu vodu sa zemljišta koje je poplavljeno.
- (2) Korisnik zemljišta koje je poplavljeno dužan je omogućiti spašavanje riba i riblje mlađi sa tog zemljišta.
- (3) Riba koja se nalazi na zemljištu koje je bilo poplavljeno pripada korisniku ribolovnog područja.

Član 42.

- (1) Poslove u području slatkovodnog ribarstva obavljaju pravna lica koje su registrovana za stručna i naučna istraživanja iz područja slatkovodnog ribarstva ili ekologije kopnenih voda.
- (2) Pravna lica iz stava 1. ovog člana obavljaju sljedeće poslove:
 - a) izrađuju ribarske osnove;
 - b) izrađuju revizije ribarskih osnova;
 - c) izrađuju stručne studije i procjene stanja ribljeg fonda, te predlažu mjere za zaštitu riba i promicanje ribarstva;
 - d) raščlanjuju podatke o akvakulturi, te predlažu mjere za promicanje akvakulture;
 - e) obavljaju hemijska istraživanja vode u akvakulturi i ribolovnim vodama;
 - f) obavljaju istraživanja na području primarne organske produkcije za potrebe ribarstva;
 - g) obavljaju istraživanja na području sekundarne organske produkcije za potrebe ribarstva;
 - h) obavljaju istraživanja uticaja unošenja ribljih vrsta u ribolovne vode;
 - i) obavljaju istraživanja uzgoja autohtonih i alohtonih vrsta riba;
 - j) izdaju certifikate o porijeklu i genetičkoj autohtonosti;
 - k) izdaju certifikate o kakvoći.
- (3) Pravna lica iz stava 1. ovog člana dužna su o obavljanju poslova iz svoje djelatnosti, a vezano za ribarstvo, najmanje jednom godišnje dostaviti izvještaj Federalnom ministarstvu.

VII NADZOR

Član 43.

- (1) Kantonalno ministarstvo obavlja upravni nadzor nad provođenjem ovoga zakona i propisa donesenih na osnovu njega u poslovima koji su dati u mjerodavnost kantona.
- (2) Inspekcijski nadzor nad provođenjem odredbi ovog Zakona i propisa donesenih na osnovu njega obavlja kantonalni poljoprivredni inspektor.

Član 44.

- (1) U provođenju inspekcijskog nadzora iz oblasti slatkovodnog ribarstva kantonalni poljoprivredni inspektor je ovlašten i obavezan:
 - a) provoditi kontrolu donošenja i provođenja godišnjeg programa, odnosno pojedinih mjera utvrđenih tim programom;
 - b) provoditi kontrolu poribljavanja ribolovne vode ribom, ribljom mlađi ili oplodjenom ikrom;
 - c) provoditi kontrolu izdavanja ribolovnih dozvola od izdavatelja dozvole do krajnjeg korisnika;

- d) provoditi kontrolu vođenja službenih podataka za područje kantona o povredama odredbi ovog zakona i propisa donesenih na osnovu njega;
 - e) izvještavati mjerodavne organe o nepravilnostima i predlagati provođenje određenih mjera, ako sam nije ovlašten za poduzimanje odgovarajućih mjera;
 - f) podnositi prijavu za pokretanje prekršajnog postupka radi povrede odredbi ovoga zakona i propisa donesenih na osnovu njega.
- (2) Kada utvrdi da je povrijeđen ovaj zakon ili drugi propis donesen na osnovu njega, inspektor ima pravo i obavezu da:
- a) zabrani izgradnju ili rekonstrukciju vodoprivrednog ili drugog objekta ili postrojenja na ribolovnoj vodi koje sprječava nesmetano razmnožavanje ribe, zaštitu ribljeg fonda i migraciju ribe;
 - b) zabrani akvakulturu i promet ribe, riblje mlađi i oplodene ikre, ako se obavlja suprotno odredbama ovoga zakona;
 - c) zabrani lov ribe nedozvoljenim sredstvima;
 - d) zabrani ispuštanje štetnih i opasnih tvari u ribolovnu vodu;
 - e) zabrani pregrađivanje vodenog toka privremenim ili stalnim pregradama koje ometaju prolaz ribe, ako to nije predviđeno investicijsko-tehničkom dokumentacijom;
 - f) zabrani zatvaranje ili crpljenje vode iz ribolovne zone, ako se time prouzrokuje opasnost za opstojnost ribe;
 - g) zabrani naglo ispuštanje vode iz prirodnih i umjetnih jezera i drugih akumulacija, ako se time prouzrokuje opasnost za opstojnost ribe;
 - h) zabrani močenje lana, konoplje, divizme i drugih štetnih biljaka u ribolovnoj vodi;
 - i) zabrani lov ribe, ako se isti obavlja suprotno članu 40. stav 1. tačka l. ovoga zakona;
 - j) narediti spašavanje ribe i riblje mlađi sa zemljišta koje je poplavljeno;
 - k) zabraniti kretanje licima bez dozvole i sa sredstvima i priborom za ribolov van puteva pored ribolovne zone, ribnjaka ili drugih ribolovnih voda;
 - l) zabrani držanje sredstava i pribora za ribolov u objektima i na objektima koji se nalaze na ribolovnoj vodi ili na drugim objektima ribolovne zone, osobi koja nije ovlaštena da obavlja ribolov;
 - m) privremeno, do odluke mjerodavnog organa, oduzme od korisnika ili fizička lica sredstva i pribor za ribolov, kao i ulov i druge predmete upotrijebljene za obavljanje radnje kažnjive po ovom zakonu i predmete nastale izvršenjem takve radnje i bez odlaganja preda mjerodavnom organu;
 - n) uzima službene uzorke radi analize u mjerodavnoj laboratoriji;
 - o) nadzire izdavanje ribolovnih dozvola od izdatelja dozvole do krajnjeg korisnika;
 - p) vodi službene podatke za područje kantona o povredama odredbi ovog zakona i propisa donesenih na osnovu njega;
 - q) izvještava mjerodavne organe o nepravilnostima i predlaže provođenje određenih mjera, ako sam nije ovlašten za poduzimanje odgovarajućih mjera;
 - r) podnosi prijavu za pokretanje prekršajnog postupka radi povrede odredbi ovog zakona i propisa donesenih na osnovu njega.
- (3) Kada kantonalni inspektor prilikom obavljanja inspekcijskog nadzora utvrdi da propis nije primijenjen ili je nepravilno primijenjen, donijet će rješenje kojim će naložiti otklanjanje utvrđene nepravilnosti i odrediti rok u kome se one moraju otkloniti.
- (4) Ako je zakonom ili drugim propisom predviđeno da se za utvrđene nepravilnosti primjenjuju određene upravne mjere, inspektor će u rješenju iz stava 2. ovog člana izreći i tu mjeru.

- (5) Protiv rješenja kantonalnog poljoprivrednog inspektora može se izjaviti žalba kantonalnom ministarstvu u roku od 15 (petnaest) dana od dana prijema rješenja.
- (6) Protiv rješenja kantonalnog ministarstva može se pokrenuti upravni spor.
- (7) Kad je za izvršavanje poslova inspekcijskog nadzora potrebno uzeti uzorke i obavljati analizu kantonalni poljoprivredni inspektor će uzeti uzorke (u daljem tekstu: službeni uzorak) i dati ih na laboratorijske pretrage u laboratorije koje ispunjavaju uslove za takve pretrage i analize.
- (8) Troškove analize službenih uzoraka nastalih u postupku snosi stranka.

VIII - KAZNE NE ODREDBE

Član 45.

- (1) Novčanom kaznom od 5.000,00 KM do 15.000,00 KM kaznit će se pravno lice za prekršaj ako:
 - a) ustupljeno mu ribolovno pravo ustupi drugom na korištenje (član 7. stav 2.);
 - b) ne donese u zakonskom roku ribarsku osnovu, godišnji program i ne obavi reviziju ribarske osnove (član 10. i član 12.);
 - c) započne obavljati djelatnost akvakulture bez dozvole (član 20. stav 3.);
 - d) obavlja djelatnost akvakulture nakon oduzimanja dozvole za akvakulturu (član 22.);
 - e) obavlja sanacijski i naučno-istraživački ribolov suprotno čl. 24. i 25;
 - f) obavlja ili omogući elektroribolov suprotno članu 26.;
 - g) ne podnese izvještaj Federalnom ministarstvu o količini i vrsti ribe, vremenu obavljanja ribolova, mjestu i načinu ribolova, odnosno korištenju pribora i sredstava (član 27.);
 - h) svake godine ne obavlja poribljavanje u skladu sa godišnjim programom (član 28. stavak (1));
 - i) obavlja poribljavanje ribolovne vode suprotno odredbama člana 28. stav 2. i 3.;
 - j) svojom aktivnošću prouzrokuje pomor ribe (član 29. stav 1);
 - k) gradi/obavlja rekonstrukciju vodoprivrednog ili drugog objekta ili postrojenja na ribolovnoj vodi, ne ugradi ili ne održava uređaje za sprečavanje ulaza ribe u turbinske i druge kanale (član 29. stav (2));
 - l) vlasnici/korisnici postojećih brana, vodoprivrednih ili drugih objekata ili postrojenja koji nisu u mogućnosti osigurati slobodnu migraciju riba ne izvrše obaveze kontinuiranog poribljavanja iz član 29. stav (3), (5) i (6);
 - m) u prirodnim ribljim mrjestilištima vadi šljunak, pijesak, kamen, panjeve i obavlja druge radnje koje ometaju mrjest, odnosno organizira ribolov (član 30. stav 1.);
 - n) za vrijeme lovostaja obavlja ribolov onih vrsta riba i lov rakova, školjki, žaba, pijavica i kornjača na koje se lovostaj odnosi (član 31. i 36.);
 - o) ne osigura čuvanje ribolovne zone (član 33. stav 1.);
 - p) obavlja lov riba, rakova, školjki, žaba, pijavica i kornjača koje nemaju propisanu veličinu (član 31. i 36.);
 - q) stavlja u promet ribu na koju se odnosi lovostaj i ne posjeduje pisani dokaz o porijeklu, odnosno uvozniku ribe, vrsti i količini ribe, kao i kupovini ribe (član 38.);
 - r) postupi suprotno članu 40. stav 1. tačke a., e., f., g., i. i j.
- (2) Za prekršaj iz stava 1. ovog člana kaznit će se i odgovorno lice u pravnom licu novčanom kaznom od 500,00 KM do 2.000,00 KM.

Član 46.

- (1) Novčanom kaznom od 2.000,00 KM do 10.000,00 KM kaznit će se za prekršaj pravno lice, ako:
- a) vidno ne označi granice ribolovne zone ili mjesto na kome je zabranjen ribolov (član 9. stav 1.);
 - b) ne uskladi programe sa susjednim korisnikom ribarskog područja-ribolovne zone (član 11. stav 1.);
 - c) ne donese privremeni program u skladu sa članom 11. stav 2. i 3.;
 - d) kao korisnik ne dostavi podatke za vođenje ribarskog katastra (član 13. stav 3.);
 - e) obavlja ribolov za naučno-istraživačke svrhe bez dozvole Federalnog ministarstva (član 25. stav 1.);
 - f) kao korisnik dozvole za ribolov za naučno-istraživačke svrhe ne obavijesti kantonalno ministarstvo i korisnika ribolovne zone (član 25. stav 3.);
 - g) unese novu vrstu ribe u ribolovne vode bez odobrenja federalnog ministra (član 28. stav 3.);
 - h) ribočuvar obavlja ribočuvarsku službu suprotno odredbama člana 33. stav 2.;
 - i) ne izda ribočuvaru legitimaciju na propisanom obrascu (član 34. stav 2.);
 - j) u prometu ribe nema pisani dokaz za ribu koja nema propisanu veličinu, pisani dokaz o porijeklu, odnosno uvozniku ribe i količini ribe, kao i datumu i mjestu ulova, odnosno kupovini ribe (član 39.);
 - k) učini neku od radnji iz člana 40. stav 1. tačke d., k. i o.;
 - l) kao korisnik ribolovne zone ne poduzme potrebne mjere vraćanja riba sa poplavljenog zemljišta (član 41. stav 1.).
- (2) Za prekršaj iz stava 1. ovog člana kaznit će se odgovorno lice u pravnom licu novčanom kaznom od 500,00 KM do 2.000,00 KM.
- (3) Za prekršaj iz stava 1. tačke e., j. i k. ovog člana, pored novčane kazne izriče se i zaštitna mjera oduzimanja predmeta koji su upotrebljeni ili bili namijenjeni obavljanju prekršaja ili su nastali njegovim izvršenjem, a za prekršaj iz tački e., g., h. i k. i zaštitna mjera oduzimanja imovinske koristi pribavljene počinjenjem prekršaja.

Član 47.

- (1) Novčanom kaznom od 1.000,00 KM do 10.000,00 KM kaznit će se udruženje sportskih ribolovaca, ako:
- a) kao korisnik ribolovne zone ribolovno pravo ustupi drugom subjektu na korištenje (član 7. stav 2.);
 - b) kao korisnik ribolovne zone vidno ne označi granice ribolovne zone i mjesta na kojima je zabranjen ribolov (član 9. stav 1.);
 - c) kao korisnik, u zakonskom roku ne donese ribarsku osnovu, godišnji program i ne uradi reviziju ribarske osnove (član 10. i član 12);
 - d) kao korisnik ne dostavi podatke za vođenje ribarskog katastra (član 13. stav 3.);
 - e) organizuje ribolov na način, sredstvima i priborom koji nisu dozvoljeni ovim zakonom i posebnim propisom (član 14. stav 1.);
 - f) uzgaja vrstu ribe ili drugih vodenih organizama koji nisu upisani u dozvolu za akvakulturu (član 22. stav 2.);
 - g) lovi ribu i obavlja druge radnje koje ometaju djelatnost akvakulture (član 23.);
 - h) kao korisnik ribolovne zone dozvoli elektroribolov suprotno odredbama člana 26.;
 - i) obavlja poribljavanje ribolovne zone suprotno odredbama člana 28. stav 2.;
 - j) unosi novu vrstu ribe u ribolovnu vodu bez odobrenja federalnog ministra (član 28. stav 3);

- k) kao korisnik ribolovne zone ne izvrši obaveze iz člana 29. stav (4) i (5));
 - l) organizuje sportski ribolov u prirodnim ribljim mrjestilištima suprotno član 30. stav (2);
 - m) ne osigura i ne organizira čuvanje ribolovne zone (član 33. stav (1));
 - n) ribočuvar nema legitimaciju i značku kojima dokazuje službeno svojstvo (član 34. stav (1));
 - o) ribočuvar postupi suprotno članu 35. stav (4), (5) i (6);
 - p) za vrijeme lovostaja organizira lov riba, rakova, školjki, žaba, pijavica i kornjača na koje se lovostaj odnosi (član 31.);
 - q) stavlja u promet ulovljenu ribu suprotno članu 37.;
 - r) na ribolovnoj zoni učini neku od radnji suprotno članu 40. stav 1. tačke d., g., j., m. i n.;
 - s) postupi suprotno članu 40. stavu 1. tačke e., f., g. i j.;
 - t) ne poduzima potrebne mjere za vraćanje riba sa zemljišta koje je poplavljeno u ribolovnu vodu (član 41. stav 1.);
- (2) Za prekršaj iz stava 1. ovog člana kaznit će se novčanom kaznom od 200,00 KM do 1.000,00 i odgovorno lice u udruženju sportskih ribolovaca.
- (3) Za prekršaj iz stava 1. tačke e., j., o., p. i s. pored novčane kazne izdaje se i zaštitna mjera oduzimanjem predmeta koji su upotrijebljeni ili su bili namijenjeni njegovim obavljanjem, a za prekršaj iz tački e., j. i k. i zaštitna mjera oduzimanja imovinske koristi pribavljene počinjenjem prekršaja.

Član 48.

- (1) Novčanom kaznom od 200,00 KM do 1.000,00 KM kaznit će se za prekršaj fizičko lice i ribič, ako:
- a) obavlja sportski ribolov zabranjenim sredstvima i alatima (član 14.);
 - b) bez dozvole korisnika ribolovne zone obavlja ribolov (član 18. stav 2.);
 - c) postupi suprotno zabrani iz člana 23.;
 - d) postupi suprotno članu 30. stav 1. i 2.;
 - e) stavlja u promet ulovljenu ribu (član 37.);
 - f) stavlja u promet ribu na koju se odnosi lovostaj i ne posjeduje pisani dokaz o porijeklu, odnosno uvozniku ribe, vrsti i količini ribe, kao i kupovini ribe (član 38.);
 - g) ako postupi suprotno članu 40. stav (1) tačke a., b., c., d., e., f., k., l., n., o. i p.
- (2) Za prekršaj iz stava 1. ovog člana, pored novčane kazne, izdaje se i zaštitna mjera oduzimanja predmeta koji su upotrebljeni ili bili namijenjeni izvršenju prekršaja ili su nastali njegovim počinjenjem kao i zaštitna mjera oduzimanja imovinske koristi pribavljene počinjenjem prekršaja i izdaje zaštitna mjera zabrane obavljanja ribolova i oduzimanja dozvole za ribolov u trajanju od jedne godine.

Član 49.

Sredstva dobivena od novčanih kazni za prekršaje i izdatih zaštitnih mjera po odredbama ovog Zakona su prihod Budžeta HNK.

IX - PRIJELAZNE I ZAVRŠNE ODREDBE

Član 50.

- (1) Ribiči, ribočuvari i članovi udruženja sportskih ribolovaca iz člana 33. stav (4) ovog zakona imaju pravo pristupa i kretanja ribolovnim vodama i prilazima preko zemljišta koje se nalaze uz ribolovnu zonu. To pravo ne odnosi se na zemljište koje je sastavni

dio dvorišta, ograđenog vrta ili voćnjaka, na zemljište na koje je pristup posebnim propisima zabranjen ili ograničen, u skladu sa posebnim zakonima iz oblasti imovinsko-pravnih odnosa.

- (2) Korisnici ribolovne zone dužni su u roku od godinu dana od dana stupanja na snagu ovog zakona uskladiti svoje poslovanje sa odredbama ovog zakona.

Član 51.

- (1) Korisnici ribolovnog prava dužni su postojeće ribarske osnove, odnosno godišnje programe, uskladiti s odredbama ovog zakona u roku od šest mjeseci od dana njegovog stupanja na snagu.
- (2) Ukoliko korisnik ribolovnog prava ne izvrši usklađivanje iz stava (1) ovog člana, ugovor o dodjeli ribolovnog prava raskida se po sili zakona istekom navedenog roka, bez prava korisnika na naknadu štete.
- (3) Ministarstvo je dužno za ribolovne zone iz stava (2) ovog člana raspisati Javni poziv za dodjelu ribolovnog prava u roku od 30 dana od dana raskida ugovora.
- (4) Postupci započeti do dana stupanja na snagu ovog zakona dovršit će se po odredbama zakona koji je bio na snazi u vrijeme pokretanja postupka, osim ako je primjena odredbi ovog zakona povoljnija za stranku.

Član 52.

- (1) Danom stupanja na snagu ovog Zakona na području HNK prestaje primjena Zakona o slatkovodnom ribarstvu Hercegovačko-neretvanskog kantona („Službene novine HNK“, broj: 04/14)
- (2) Stupanjem na snagu ovog Zakona stavlja se van snage Pravilnik o programu i načinu polaganja ribočuvarskog ispita („Službene novine HNK“, broj: 11/15).
- (3) Na području HNK primjenjivat će se ostali podzakonski propisi doneseni na osnovu Zakona o slatkovodnom ribarstvu Hercegovačko-neretvanskog kantona („Službene novine HNK“, broj: 04/14), ukoliko nisu u suprotnosti sa odredbama ovog Zakona.

Član 53.

Ovaj zakon stupa na snagu osmog dana od dana objavljivanja u "Službenim novinama HNK".

Bosna i Hercegovina
Federacija Bosne i Hercegovine
Hercegovačko-neretvanski kanton
S K U P Š T I N A

Broj:
Mostar, _____ 2026. godine

P R E D S J E D A V A J U Ć I
Džafer Alić v.r.

O B R A Z L O Ž E N J E
UZ NACRT ZAKONA O SLATKOVODNOM RIBARSTVU
HERCEGOVAČKO-NERETVANSKOG KANTONA

I. USTAVNO PRAVNI I ZAKONSKI OSNOV ZA DONOŠENJE ZAKONA

Ustavni osnov za donošenje Zakona o slatkovodnom ribarstvu Hercegovačko-neretvanskog kantona sadržana je u odredbi čl. III.2. i III.3. Ustava FBiH, kao i u čl. 16., 17. i 39. stav 1. tačka f) Ustava Hercegovačko-neretvanskog kantona.

Navedenim odredbama propisana je nadležnost federalnih i kantonalnih vlasti u oblasti korištenja prirodnih bogatstava, dok je u članu 39. stav 1. tačka f) Ustava Hercegovačko-neretvanskog kantona propisana ovlast Skupštine Hercegovačko-neretvanskog kantona za donošenje Zakona.

Zakonski osnov za donošenje ovoga Zakona sadržan je u odredbama člana 21. stav 1., a u vezi s članom 39. stav 1. tačka c) Zakona o organizaciji organa uprave u Hercegovačko-neretvanskom kantonu („Službene novine Hercegovačko-neretvanskog kantona“, broj: 09/09).

II. RAZLOZI ZA DONOŠENJE ZAKONA I OBJAŠNJENJE ODABRANE POLITIKE

Ministarstvo je u 2024. godini pripremilo Prijedlog Zakona o izmjenama i dopunama Zakona o slatkovodnom ribarstvu HNK i isti uputilo na mišljenja. Ministarstvo pravosuđa, uprave i lokalne samouprave HNK dalo je mišljenje broj: 03-02-692/25 od 23.01.2025. godine da se prilikom izrade kantonalnog Zakona treba dosljedno pridržavati odredbi Zakona o slatkovodnom ribarstvu („Službene novine FBiH“ 64/04, 27/10) te da je u Zakonu o izmjenama i dopunama Zakona o slatkovodnom ribarstvu HNK izmijenjeno preko 50 posto osnovnog teksta Zakona. Shodno navedenom predložili su izradu novog zakona.

Nakon konsultacija u Ministarstvu je zauzet stav da se pristupi izradi novog Nacrta Zakona o slatkovodnom ribarstvu HNK.

Prilikom izrade ovog Nacrta Zakona vodilo se računa da odredbe budu usaglašene sa Federalnim Zakonom o slatkovodnom ribarstvu

III. KONSULTACIJE

Dana 05.09.2025. godine tekst Nacrta Zakona objavljen je na web stranici MPŠV HNK u svrhu Javne rasprave. Također, istog dana tekst Nacrta Zakona dostavljen je svim jedinicama lokalne samouprave na području HNK, Savezu općina i gradova FBiH, Federalnom ministarstvu poljoprivrede, vodoprivrede i šumarstva s ciljem dostavljanja prijedloga i komentara. Rok za dostavljanje prijedloga i komentara na Nacrt Zakona je bio 15 (petnaest) dana od dana objave tj. do 23.09.2025. godine.

Nakon razmatranja dostavljenih prijedloga i komentara, pripremljen je novi tekst Nacrta Zakona i zauzet stav da se ponovo stavi na web stranicu Ministarstva radi provođenja Javne rasprave, te dostavi svim općinama/gradovima u HNK, Savezu općina/gradova FBiH i Federalnom ministarstvu poljoprivrede, vodoprivrede i šumarstva radi eventualnih primjedbi.

IV. IZMJENE U ODNOSU NA TEKST NACRTA ZAKONA KOJI JE BIO 05.09.2025. GODINE PREDMET JAVNE RASPRAVE

Osim sugestija i primjedbi koje su bile tehničke prirode i koje su usvojene, u tekstu ovog Nacrta Zakona urađene su izmjene manjeg obima na osnovu dostavljenih komentara. Posebno se ističe član 29. Nacrta Zakona. Izmjene u ovom članu su značajne u odnosu na dosadašnji član, a sve su u cilju da se osigura efikasnije i transparentnije poribljavanje ribolovnih voda. Također, izvršene su izmjene u članu 10. i članu 12. na način da je detaljno razrađen sadržaj Programa i Plana poribljavanja, a opet u cilju provođenja efikasnog poribljavanja ribolovnih voda.

IV. OČEKIVANI UČINAK ZAKONA

Ovim Nacrtom Zakona osigurava se uključivanje jedinica lokalne samouprave u postupke koji su regulisani ovim Zakonom, što je u skladu sa Zakonom o izmjenama i dopuni Zakona o slatkovodnom ribarstvu („Službene novine FBiH“, broj 10/25), te se otklanjaju određene nejasnoće koje su uočene kroz praktičnu primjenu Zakona o slatkovodnom ribarstvu i uvodi transparentnost u postupke izrade dokumenata na osnovu kojih se koristi ribolovnim vodama, te osigurava efikasnije provođenje poribljavanja i održavanja ribljeg fonda.

NAČIN FINANSIRANJA PROVOĐENJA ZAKONA

Za provođenje Zakona o slatkovodnom ribarstvu HNK, nisu potrebna dodatna sredstva iz Budžeta Hercegovačko – neretvanskog kantona.